

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৮৪/২০১৭-১৮

ঢাকা, রোববার ২৯ অক্টোবর ২০১৭, ১৪ কার্তিক ১৪২৪

- ১। তৃণমূল পর্যায়ে উন্নয়ন সেবা পৌঁছে দিতে মেয়রদের ভূমিকা গুরুত্বপূর্ণ : স্পিকার
- ২। এমডিজি অর্জনে বাংলাদেশ বিশ্বে রোল মডেল : এলজিআরডিমন্ত্রী
- ৩। কমিউনিটি পুলিশ শক্তিশালী হলে নিরাপত্তা বাড়বে : স্বরাষ্ট্রমন্ত্রী
- ৪। যক্ষ্মাকে শূন্যের কোটায় নামিয়ে আনব : স্বাস্থ্যমন্ত্রী
- ৫। শিক্ষকরা সরকারের পরামর্শক, উন্নয়নের মুখপাত্র : পরিকল্পনামন্ত্রী
- ৬। মুক্তিযুদ্ধের বাংলাদেশ সমৃদ্ধির দ্বারপ্রান্তে উপনীত হয়েছে : ভারতীয় প্রতিরক্ষা মন্ত্রী
- ৭। ভীতিমুক্ত পুলিশ ব্যবস্থা সৃষ্টি করতে হবে : র্যাব মহাপরিচালক
- ৮। ব্যাংকগুলোকে শিক্ষায় বরাদ্দ বাড়ানোর আহ্বান গভর্নরের
- ৯। রোহিঙ্গাদের হামলায় রামুতে এক বাংলাদেশি নিহত : উখিয়ায় আহত ৫

১। তৃণমূল পর্যায়ে উন্নয়ন সেবা পৌঁছে দিতে মেয়রদের ভূমিকা গুরুত্বপূর্ণ : স্পিকার

জাতীয় সংসদের স্পিকার ড. শিরীন শারমিন চৌধুরী বলেছেন, তৃণমূল পর্যায়ে উন্নয়ন সেবা পৌঁছে দিতে মেয়রদের ভূমিকা গুরুত্বপূর্ণ। গতকাল (২৮ অক্টোবর শনিবার) রাজধানীর হোটেল সোনারগাঁওয়ে বিশ্বব্যাপক, বাংলাদেশ ইনস্টিটিউট অব প্ল্যানার্স ও ইনস্টিটিউট অব আর্কিটেক্টস বাংলাদেশ-এর আয়োজনে 'সিটিজ ফোরাম : বিল্ডিং নলেজ নেটওয়ার্ক অ্যান্ড পার্টনারশিপ ফর সাসটেনেবল ডেভেলপমেন্ট ইন বাংলাদেশ' শীর্ষক আন্তর্জাতিক সম্মেলনের উদ্বোধন অনুষ্ঠানে প্রধান অতিথির বক্তব্যে তিনি এসব কথা বলেন। সূত্র-সংবাদ (শেষ পৃ.,ক.১), জনকণ্ঠ (পৃ.১,ক.৭), ইন্ডিপেনডেন্ট (শেষ পৃ.,ক.২), নিউজ টুডে (পৃ.৩,ক.২)।

২। এমডিজি অর্জনে বাংলাদে বিশ্বে রোল মডেল : এলজিআরডিমন্ত্রী

২০৩০ সালের মধ্যে টেকসই উন্নয়ন লক্ষ্যমাত্রা পূরণেও বাংলাদেশ বিশ্বে অনুকরণীয় হবে বলে জানিয়েছেন স্থানীয় সরকার, পল্লী উন্নয়ন ও সমবায়মন্ত্রী খন্দকার মোশাররফ হোসেন। তিনি বলেন, প্রধানমন্ত্রী শেখ হাসিনার নেতৃত্বে জাতিসংঘ ঘোষিত সহস্রাব্দ উন্নয়ন লক্ষ্যমাত্রা (এমডিজি) অর্জনে বিশ্বে বাংলাদেশ রোল মডেল। গতকাল (২৮ অক্টোবর শনিবার) প্রকৌশল বিশ্ববিদ্যালয় অডিটরিয়ামে বুয়েট অ্যালামনাই আয়োজিত 'টেকসই উন্নয়ন লক্ষ্যমাত্রা অর্জনে স্থপতি, প্রকৌশলী ও নগর পরিকল্পনাবিদদের ভূমিকা' শীর্ষক এক সেমিনারের উদ্বোধন অনুষ্ঠানে প্রধান অতিথির বক্তৃতায় মন্ত্রী এসব কথা বলেন। সূত্র-সংবাদ (শেষ পৃ.,ক.৫), ইত্তেফাক (পৃ.৩,ক.৫), ইন্ডিপেনডেন্ট (শেষ পৃ.,ক.১), নিউজ টুডে (পৃ.২,ক.২)।

৩। কমিউনিটি পুলিশ শক্তিশালী হলে নিরাপত্তা বাড়বে : স্বরাষ্ট্রমন্ত্রী

স্বরাষ্ট্রমন্ত্রী আসাদুজ্জামান খাঁন কামাল বলেছেন, জঙ্গি, মাদক ও সন্ত্রাসবাদ নিয়ন্ত্রণে পুলিশ বাহিনীর পাশাপাশি কমিউনিটি পুলিশও জোরালো ভূমিকা পালন করছে। কমিউনিটি পুলিশ শক্তিশালী হলে নিরাপত্তা বাড়বে। তিনি বলেন, অপরাধ দমনে কমিউনিটি পুলিশ প্রতিনিয়ত নানা তথ্য-উপাত্ত পুলিশকে অবহিত করছে এবং সে আলোকে পুলিশ ব্যবস্থা গ্রহণ করে চলেছে। ফলে সামাজিক অপরাধের প্রবণতা অনেক কমে এসেছে। আগে গ্রাম-পাড়া-মহল্লায় স্থানীয় মাতব্বররা যে সামাজিক কর্মকাণ্ড করতেন, সেটাই এখন করছেন কমিউনিটি পুলিশের সদস্যরা। গতকাল (২৮ অক্টোবর শনিবার) প্রথমবারের মতো 'কমিউনিটি পুলিশিং ডে-২০১৭' উদযাপন অনুষ্ঠানে প্রধান অতিথির বক্তৃতায় তিনি এসব কথা বলেন। রাজধানীর ডিপ্লোমা ইঞ্জিনিয়ার্স ইনস্টিটিউট মিলনায়তনে এ অনুষ্ঠানের আয়োজন করে ঢাকা মহানগর পুলিশের রমনা বিভাগ। সূত্র-ইত্তেফাক (শেষ পৃ.,ক.১), জনকণ্ঠ (পৃ.৩,ক.৬), বাংলাদেশ টুডে (শেষ পৃ.,ক.৬), নিউজ টুডে (পৃ.২,ক.২)।

৪। যক্ষ্মাকে শূন্যের কোটায় নামিয়ে আনব : স্বাস্থ্যমন্ত্রী

স্বাস্থ্য ও পরিবার কল্যাণ মন্ত্রী মোহাম্মদ নাসিম বলেছেন, স্বাস্থ্যখাতে সরকারের সফলতা আন্তর্জাতিকভাবে স্বীকৃত। সরকারের প্রচেষ্টায় পোলিও, ধনুষ্ঠংকার নির্মূলের পাশাপাশি মা ও শিশু মৃত্যুহ্রাসসহ সংক্রামক ব্যাধি মোকাবিলায় বাংলাদেশ অনেক দূর এগিয়েছে। এবার আমরা যেকোনো মূল্যে যক্ষ্মা নির্মূল করতে চাই। যক্ষ্মাকে শূন্যের কোটায় নামিয়ে আনতে সরকার বদ্ধপরিকর। গতকাল (২৮ অক্টোবর শনিবার) রাজধানীর হোটেল রেডিসনে বাংলাদেশের শহরগুলোতে যক্ষ্মার প্রাদুর্ভাব শূন্যের কোটায় আনার লক্ষ্যে আয়োজিত কর্মসূচির উদ্বোধন অনুষ্ঠানে তিনি এ কথা বলেন। সূত্র-ইত্তেফাক (শেষ পৃ.,ক.৫), জনকণ্ঠ (শেষ পৃ.,ক.৪), ইন্ডিপেনডেন্ট (পৃ.১৯,ক.৪), নিউজ টুডে (পৃ.৩,ক.৮)।

৫। শিক্ষকরা সরকারের পরামর্শক, উন্নয়নের মুখপাত্র : পরিকল্পনামন্ত্রী

পরিকল্পনামন্ত্রী আ হ ম মুস্তফা কামাল এমপি বলেছেন, শিক্ষাই জাতির মেরুদণ্ড, আর শিক্ষকরা উন্নয়নের মুখপাত্র। একটি সুখী-সমৃদ্ধশালী জাতি গঠনে শিক্ষাই হচ্ছে মূল চালিকাশক্তি। একটি জাতির, সভ্যতার প্রধান মাপকাঠি শিক্ষা। তিনি বলেন, ভবিষ্যৎ প্রজন্মকে সঠিকভাবে গড়ে তুলতে শিক্ষকদের অবদানের কোনো বিকল্প নেই। তারা রাজনীতি, অর্থনীতি, আইনসহ প্রতিটি বিষয়ে সরকারের পরামর্শক হিসেবে কাজ করেন। গতকাল

(২৮ অক্টোবর শনিবার) কুমিল্লা সদর দক্ষিণ উপজেলা কমপ্লেক্সে কুমিল্লা সদর দক্ষিণ ও লালমাই উপজেলার শিক্ষক সমাবেশে প্রধান অতিথির বক্তব্যে তিনি এসব কথা বলেন। সূত্র-ইত্তেফাক (পৃ.২,ক.৬), ভোরের কাগজ (শেষ পৃ.,ক.১), ডেইলি স্টার (পৃ.৫,ক.৫)

৬। মুক্তিযুদ্ধের বাংলাদেশ সমৃদ্ধির দ্বারপ্রান্তে উপনীত হয়েছে : ভারতীয় প্রতিরক্ষা মন্ত্রী

বিশ্ববাসীর সঙ্গে আমরা প্রত্যক্ষ করছি যে, মুক্তিযুদ্ধের বাংলাদেশ সমৃদ্ধির দ্বারপ্রান্তে উপনীত হয়েছে। ভারতের প্রতিরক্ষা মন্ত্রী শ্রীমতি নির্মালা সীতারামান-এর সঙ্গে বিসিএস মুক্তিযোদ্ধা ও মুজিবনগর অফিসার-কর্মচারী কল্যাণ সমিতির মহাসচিব মোহাম্মদ মুসা এবং নব প্রজন্ম মুক্তিযোদ্ধা সংগঠনের সভাপতি হাবিব-ই-আকবর দিল্লীর সাউথ ব্লকে সম্প্রতি তার সঙ্গে গতকাল (২৮ অক্টোবর শনিবার) সঙ্গে এক সৌজন্য সাক্ষাৎকালে তিনি এ কথা বলেন। তিনি আরো বলেন, রোহিঙ্গা সমস্যা একটি মারাত্মক মানবিক বিপর্যয় সৃষ্টিকারী সমস্যা এবং বিশ্ব মানবজাতি মানবিক দৃষ্টিকোণ থেকে এর সমাধান দেখতে চায়। সূত্র-ইত্তেফাক (পৃ.১৯,ক.১), ইন্ডিপেনডেন্ট (পৃ.১৯,ক.২), নিউ এজ (পৃ.১১,ক.১)।

৭। ভীতিমুক্ত পুলিশ ব্যবস্থা সৃষ্টি করতে হবে : র্যাব মহাপরিচালক

পুলিশের বিশেষায়িত ফোর্স র্যাপিড অ্যাকশন ব্যাটালিয়নের (র্যাব) মহাপরিচালক বেনজীর আহমেদ বলেছেন, শক্তি প্রয়োগ করলে পুলিশের ওপর জনগণের আস্থা নষ্ট হয়। তাই শক্তি প্রয়োগ না করে পুলিশের ওপর জনগণের আস্থা ফেরাতে হবে। দেশে ভীতিমুক্ত পুলিশ ব্যবস্থা সৃষ্টি করতে হবে। এটি পুলিশেরই দায়িত্ব। গতকাল (২৮ অক্টোবর শনিবার) রাজশাহী মেট্রোপলিটন পুলিশ (আরএমপি) আয়োজিত ‘কমিউনিটি পুলিশিং ডে-২০১৭’ উপলক্ষে এক সমাবেশে প্রধান অতিথির বক্তব্যে তিনি এ কথা বলেন। সূত্র-ইত্তেফাক (পৃ.১৯,ক.৪), ইনকিলাব (পৃ.১,ক.৬)।

৮। ব্যাংকগুলোকে শিক্ষায় বরাদ্দ বাড়ানোর আহ্বান গভর্নরের

ব্যাংকগুলোকে সামাজিক দায়বদ্ধতা (সিএসআর) খাতের আওতায় শিক্ষাখাতে বরাদ্দ বাড়ানোর তাগিদ দিয়েছেন বাংলাদেশ ব্যাংক গভর্নর ড. ফজলে কবির। তিনি বলেছেন, মেধাবী শিক্ষার্থীরা দেশের ভবিষ্যৎ। তাদের মেধা আমাদের চেয়েও বেশি, কিন্তু সুযোগের অভাবে সঠিক বিকাশ ঘটে না। তাদের মেধার বিকাশে ব্যাংকগুলোর উচিত শিক্ষায় বরাদ্দ বাড়ানো। গতকাল (২৮ অক্টোবর শনিবার) রাজধানীতে মার্কেন্টাইল ব্যাংক আব্দুল জলিল শিক্ষাবৃত্তি-২০১৬ প্রদান অনুষ্ঠানে প্রধান অতিথির বক্তব্যে তিনি একথা বলেন। সূত্র-ইত্তেফাক (পৃ.১৮,ক.৬), সংবাদ (পৃ.১৩,ক.৬), জনকণ্ঠ (পৃ.১৮,ক.১), ইন্ডিপেনডেন্ট (পৃ.৮,ক.৬)।

৯। রোহিঙ্গাদের হামলায় রামুতে এক বাংলাদেশি নিহত : উখিয়ায় আহত ৫

রোহিঙ্গাদের হামলায় পৃথক দুই ঘটনায় বাংলাদেশি এক যুবক নিহত এবং আহত হয়েছে ৫ জন। বন বিভাগের জমি দখলের বিরোধে কক্সবাজারের রামুতে এক রোহিঙ্গা যুবকের হামলায় এক বাংলাদেশি নিহত হয়েছে। এছাড়া কক্সবাজারের উখিয়ায় গতকাল (২৮ অক্টোবর শনিবার) রাতে রোহিঙ্গাদের হামলায় পাঁচ জন আহত হওয়ার অভিযোগ পাওয়া গেছে। হত্যার ঘটনায় রোহিঙ্গা যুবক ও তার ফুফুকে গ্রেফতার করা হয়। এছাড়া উখিয়ায় হামলার ঘটনায় জড়িত সন্দেহে বালুখালী ক্যাম্প এলাকা থেকে দুই জন রোহিঙ্গাকে আটক করেছে পুলিশ। তাদের কাছ থেকে কাটা রাইফেল ও ছয়টি কার্তুজ পাওয়া গেছে। সূত্র-সংবাদ (পৃ.১,ক.৭), ভোরের কাগজ (পৃ.১,ক.৫), ইন্ডিপেনডেন্ট (পৃ.১,ক.১), ডেইলি সান (পৃ.১,ক.৫)।

সম্পাদকীয়

- ক. **ইত্তেফাক** : প্রধানমন্ত্রী শেখ হাসিনা কর্তৃক উদ্বোধনের পর মগবাজার-মৌচাক ফ্লাইওভার চালু হওয়ায় স্বাগত জানিয়ে এ ফ্লাইওভার ব্যবহারে যত্নবান ও ট্রাফিক রুল মেনে চলার জন্য সবাইকে সচেতন হওয়ার আহ্বান।
- খ. **সংবাদ** : রাজধানীর জলাবদ্ধতা, পানি নিষ্কাশন ও ভূ-গর্ভস্থ পানির স্তর ক্রমাগত নিচে নেমে যাওয়ায় তুরাগসহ চারপাশের নদ-নদীগুলো পুনরুদ্ধার ও সংরক্ষণের ওপর গুরুত্বারোপ।
- গ. **প্রথম আলো, ইনকিলাব, নিউ এজ, নিউ নেশন** : জাতিসংঘসহ বিশ্বের প্রভাবশালী রাষ্ট্রগুলোর আহ্বান ও চাপ সত্ত্বেও বাংলাদেশে আসা রোহিঙ্গাদের ফিরিয়ে নিতে মিয়ানমার সরকারের কালক্ষেপণ করার কথা উল্লেখ করে রোহিঙ্গাদের ফিরিয়ে নিতে মিয়ানমারকে বাধ্য করতে কার্যকর পদক্ষেপ নেওয়ার ওপর গুরুত্বারোপ।
- ঘ. **সমকাল** : পরিবেশ রক্ষায় সবাইকে সচেতন হওয়ার আহ্বান।
- ঙ. **ইন্ডিপেনডেন্ট** : দেশে জনসংখ্যা সীমিত রাখতে সবাইকে সচেতন হওয়ার আহ্বান।
- চ. **নিউজ টুডে** : ইন্টারনেটের অন্ধকার দিক হতে তরণদের মুক্ত রাখতে যথাযথ পদক্ষেপ নেওয়ার সুপারিশ।
- ছ. **নিউ নেশন** : বিভিন্ন পাবলিক পরীক্ষার প্রশ্নপত্র ফাঁস রোধে কঠোর ব্যবস্থা নেওয়ার দাবি জানিয়ে সম্পাদকীয় প্রকাশ।

উপসম্পাদকীয়

সমকাল পত্রিকায় প্রকাশিত কলামে উল্লেখ করা হয়েছে, শিশুদের সময়মতো টিকা দিলে বিভিন্ন রোগে আক্রান্ত হওয়ার আগেই তা প্রতিরোধ করা সম্ভব।

নিবন্ধ ও ফিচার

ইত্তেফাক পত্রিকায় প্রকাশিত 'বেসরকারি বিশ্ববিদ্যালয়ের প্রতি অবহেলা নয়' শিরোনামের নিবন্ধে অভিমত প্রকাশ করা হয়েছে, বেসরকারি বিশ্ববিদ্যালয়ের মানোন্নয়নে নজর দিলে শিক্ষাক্ষেত্রে তা অবদান রাখবে।

#

ডালিয়া/ফাহিমা/মরজিনা/সাদ্দা/তানিয়া/২০১৭/৯.০০ঘণ্টা